



SLUŽBENE NOVINE

KANTONA SARAJEVO

Godina XXX - Broj 26

Četvrtak, 3. 7. 2025. godine
SARAJEVO

ISSN 1512-7052

KANTON SARAJEVO

Vlada Kantona Sarajevo

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), člana 7. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 12/03, 34/03 i 65/13) i člana 5. stav (4) Odluke o osnivanju Savjeta za elektronsku upravu ("Službene novine Kantona Sarajevo", broj 18/25 i 20/25), a u vezi sa članom 41. stav (5) Zakona o elektronskom upravljanju u Kantonu Sarajevo ("Službene novine Kantona Sarajevo", broj 6/25), Vlada Kantona Sarajevo, na 80. sjednici održanoj 19.06.2025. godine, donijela je

ODLUKU

O STANDARDIMA I KRITERIJIMA ZA IMENOVANJE VANJSKIH EKSPERATA KAO ČLANOVA SAVJETA ZA ELEKTRONSKU UPRAVU

Član 1.

(Predmet)

Ovom odlukom utvrđuju se standardi i kriteriji za imenovanje vanjskih eksperata iz oblasti informaciono-komunikacionih tehnologija kao članova Savjeta za elektronsku upravu shodno odredbama Zakona o elektronskom upravljanju u Kantonu Sarajevo ("Službene novine Kantona Sarajevo", broj 6/25) i Odluke o osnivanju Savjeta za elektronsku upravu ("Službene novine Kantona Sarajevo", broj 18/25 i 20/25).

Član 2.

(Rodna neutralnost izraza)

Izrazi koji se koriste u ovoj odluci, a imaju rodno značenje, koriste se neutralno i odnose se jednako na muški i ženski rod.

Član 3.

(Uslovi za imenovanje)

(1) Na poziciju vanjskog eksperta iz člana 1. ove odluke može biti imenovan kandidat koji ispunjava sljedeće opće uslove:

a) da je državljanin Bosne i Hercegovine,

b) da je stariji od 18 godina,

c) da nije otpušten iz državne službe kao rezultat disciplinske mjere na bilo kojem nivou u Bosni i Hercegovini (bilo na nivou države ili entiteta) u periodu od tri godine prije dana objavljivanja upražnjene pozicije,

d) da se na njega ne odnosi član IX 1. Ustava Bosne i Hercegovine,

e) da nije pravosnažno osuđivan za krivično djelo,

f) da nije na funkciji u političkoj stranci,

g) da nije izabran zvaničnik, nosilac izvršnih funkcija ili savjetnik u smislu Zakona o sukobu interesa u organima vlasti u Federaciji Bosne i Hercegovine ("Službene novine Federacije BiH", broj 70/08) i da nije nosilac javne funkcije u smislu Zakona o prevenciji i suzbijanju korupcije u Kantonu Sarajevo ("Službene novine Kantona Sarajevo", broj 35/22, 44/22 - Ispravka i 52/22 - Ispravka).

(2) Pored navedenih općih uslova iz stava (1) ovog člana, kandidat koji se imenuje na poziciju vanjskog eksperta iz člana 1. ove odluke treba da ispunjava i sljedeće posebne uslove:

a) da ima visoko obrazovanje najmanje VII stepen stručne spreme, odnosno stečeno akademsko zvanje nakon završenog prvog, drugog ili trećeg ciklusa Bolonjskog sistema studiranja iz oblasti informaciono-komunikacionih tehnologija,

b) da ima najmanje sedam godina radnog iskustva u struci nakon sticanja visoke stručne spreme, odnosno akademskog zvanja, od čega najmanje tri godine iskustva u radu na poslovima koji uključuju digitalizaciju poslovnih procesa, razvoj elektronske uprave, projektovanje interoperabilnih informacionih sistema, planiranje, upravljanje ili evaluaciju informaciono-komunikacionih projekata, ili razvoj i implementaciju jedinstvenih korisničkih portala i centralnih registara,

- c) da ima iskustvo u radu sa organima uprave i da je upoznat sa procesima javne uprave u Bosni i Hercegovini,
 - d) da posjeduju relevantne certifikate koji se odnose na upravljanje projektima iz oblasti informaciono-komunikacionih tehnologija, na standarde i prakse iz oblasti informacionih tehnologija, na informacione sigurnosne sisteme i na metodologije razvoja softvera,
 - e) da je autor ili koautor objavljenih stručnih ili naučnih radova iz oblasti elektronske uprave, digitalne transformacije, informaciono-komunikacionih strategija i srodnih oblasti.
- (3) Uslovi iz stava (2) tačka c), d) i e) nisu eliminatorni, odnosno kandidati koji ih ne ispunjavaju mogu i dalje učestvovati u konkursnoj proceduri.
- (4) Dokaz o ispunjavanju uslova iz stava (1) tačka e) ovog člana, pribavlja organ imenovanja, po službenoj dužnosti, prije imenovanja kandidata na poziciju vanjskog eksperta iz člana 1. ove odluke.

Član 4.

(Primjena standarda)

Prilikom utvrđivanja ili primjene standarda, Vlada Kantona Sarajevo (u daljem tekstu: Vlada) neće vršiti diskriminaciju prema bilo kome na temelju rase, nacionalnog ili etničkog porijekla, boje, vjere, spola, bračnog statusa, porodičnog statusa, invalidnosti ili postojanja presude za koju je izrečeno pomilovanje.

Član 5.

(Oglašavanje)

- (1) Na osnovu općih uslova utvrđenih u članu 7. stav (1) Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 12/03, 34/03 i 65/13) i standarda i kriterija iz ove odluke, ministar pravde i uprave Kantona Sarajevo (u daljem tekstu: ministar) objavljuje javni oglas za pozicije vanjskih eksperata iz člana 1. ove odluke.
- (2) Javni oglas iz stava (1) ovog člana objavljuje se u "Službenim novinama Federacije BiH", najmanje jednom dnevnom listu velikog tiraža i na zvaničnoj internet stranici Vlade i Ministarstva pravde i uprave Kantona Sarajevo.

Član 6.

(Komisija za izbor)

- (1) Komisiju za izbor vanjskih eksperata iz oblasti informaciono-komunikacionih tehnologija kao članova Savjeta za elektronsku upravu (u daljem tekstu: Komisija) rješenjem imenuje Vlada na prijedlog ministra.
- (2) Rješenjem Vlade o imenovanju Komisije iz stava (1) ovog člana bliže će se urediti radni zadaci Komisije.

Član 7.

(Čuvanje standarda i kriterija)

Standardi i kriteriji za imenovanje vanjskih eksperata iz oblasti informaciono-komunikacionih tehnologija kao članova Savjeta za elektronsku upravu čuvaju se u evidenciji Ministarstva pravde i uprave Kantona Sarajevo.

Član 8.

(Stupanje na snagu)

Ova odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-34590-15/25

19. juna 2025. godine
SarajevoPremijer
Nihad Uk, s. r.